

0.0.1 piṇḍapātapārisuddhisuttaṃ

1. evaṃ me sutam: ekaṃ samayaṃ bhagavā rāja-
gahe viharati veḷuvane kalandakanivāpe. atha kho
āyasmā sārīputto sāyanhasamayaṃ patisallānā vuṭṭhito
yena bhagavā tenupasaṅkami. upasaṅkamitvā bhaga-
vantaṃ abhivādetvā ekamantaṃ nisīdi. ekamantaṃ
nisinnaṃ kho āyasmantaṃ sārīputtaṃ bhagavā etada-
voca:

2. vipprasannāni kho te sārīputta, indriyāni parisud-
dho chavivaṇṇo pariyodāto. katamena kho tvaṃ sārī-
putta, vihārena etarahi bahulaṃ viharasīti:

3. suññatā vihārena kho ahaṃ bhante, etarahi bahu-
laṃ viharāmī'ti.

4. sādhu sādhu sārīputta, mahāpurisavihārena kira
tvaṃ sārīputta, ekarahi bahulaṃ viharasi. 'mahāpuri-
savihāro hesa sārīputta, yadidaṃ suññatā.

5. tasmātiha sārīputta, bhikkhu sace ākaṅkheyya, suñ-
ñatā vihārena etarahi bahulaṃ vihareyya'nti. tena sārī-
putta, bhikkhunā iti paṭisaṅcikkhitabbaṃ: 'yena cā-
haṃ maggena gāmaṃ piṇḍāya pāvisiṃ, yasmiṃca pa-
dese piṇḍāya avariṃ, yena ca maggena gāmato piṇ-
ḍāya paṭikkamiṃ atthi nu kho me tattha cakkhuviñ-

ñeyyesu rūpesu chando vā rāgo vā doso vā moho vā paṭighaṃ vāpi cetaso'ti.

6. sace sārīputta, bhikkhu paccavekkhamāno evaṃ jānāti: 'yena cāhaṃ maggena gāmaṃ piṇḍāya pāvisiṃ. yasmiñca padese piṇḍāya acarim, yena ca maggena gāmato piṇḍāya paṭikkamim. atthi me tattha cakkhuviññeyyesu rūpesu chando vā rāgo vā doso vā moho vā paṭighaṃ vāpi cetaso'ti. tena sārīputta, bhikkhunā tesamyeva pāpakānaṃ akusalānaṃ dhammānaṃ pahānāya vāyamitabbaṃ.

7. sace pana sārīputta, bhikkhu paccavekkhamāno evaṃ jānāti: yena cāhaṃ maggena gāmaṃ piṇḍāya pāvisiṃ, yasmañca padese piṇḍāya acarim, yena ca maggena gāmato piṇḍāya paṭikkamim. natthi me tattha cakkhuviññeyyesu rūpesu chando vā rāgo vā doso vā moho vā paṭighaṃ vāpi cetaso'ti. tena sārīputta, bhikkhunā teneva pitipāmojjena vihātabbaṃ ahoratānusikkhinā kusalesu dhammesu.

8. puna ca paraṃ sārīputta, bhikkhunā iti paṭisañcikkhitabbaṃ: 'yena cāhaṃ maggena gāmaṃ piṇḍāya pāvisiṃ, yasmiñca padese piṇḍāya acarim, yena ca maggena gāmato piṇḍāya paṭikkamim. atthi nu kho me tattha sotaviññeyyesu saddesu chando vā rāgo vā doso vā moho vā paṭighaṃ vāpi cetaso'ti.

9. sace sārīputta, bhikkhu paccavekkhamāno evaṃ jānāti: 'yena cāhaṃ maggena gāmaṃ piṇḍāya pāvisiṃ. yasmiñca padese piṇḍāya acarim, yena ca maggena gāmato piṇḍāya paṭikkamim. atthi me tattha sotaviññeyyesu saddesu chando vā rāgo vā doso vā moho vā paṭighaṃ vāpi cetaso'ti. tena sārīputta, bhikkhunā tesamyeva pāpakānaṃ akusalānaṃ dhammānaṃ pahānāya vāyamitabbam.

10. sace pana sārīputta, bhikkhu paccavekkhamāno evaṃ jānāti: yena cāhaṃ maggena gāmaṃ piṇḍāya pāvisiṃ, yasmiñca padese piṇḍāya acarim, yena ca maggena gāmato piṇḍāya paṭikkamim. natthi me tattha sotaviññeyyesu saddesu chando vā rāgo vā doso vā moho vā paṭighaṃ vāpi cetaso'ti. tena sārīputta, bhikkhunā teneva pitipāmojjena vihātabbam ahoratānusikkhinā kusalesu dhammesu.

11. puna ca paraṃ sārīputta, bhikkhunā iti paṭisañcikkhitabbam: 'yena cāhaṃ maggena gāmaṃ piṇḍāya pāvisiṃ, yasmiṃ ca padese piṇḍāya acarim, yena ca maggena gāmato piṇḍāya paṭikkamim. atthi nu kho me tattha ghānaviññeyyesu gandhesu chando vā rāgo vā doso vā moho vā paṭighaṃ vāpi cetaso'ti.

12. sace sārīputta, bhikkhu paccavekkhamāno evaṃ jānāti: 'yena cāhaṃ maggena gāmaṃ piṇḍāya pāvisiṃ. yasmiñca padese piṇḍāya acarim, yena ca maggena gāmato piṇḍāya paṭikkamim. atthi me tattha ghānaviññeyyesu gandhesu chando vā rāgo vā doso

vā moho vā paṭighaṃ vāpi cetaso'ti. tena sārīputta, bhikkhunā tesamyeva pāpakānaṃ akusalānaṃ dhammānaṃ pahānāya vāyāmitabbaṃ.

13. sace pana sārīputta, bhikkhu paccavekkhamāno evaṃ jānāti: yena cāhaṃ maggena gāmaṃ piṇḍāya pāvisiṃ, yasmiṃ ca padese piṇḍāya acarīṃ, yena ca maggena gāmato piṇḍāya paṭikkamiṃ. natthi me tattha ghānaviññeyyesu gandhesu chando vā rāgo vā doso vā moho vā paṭighaṃ vāpi cetaso'ti. tena sārīputta, bhikkhunā teneva pitipāmojjena vihātabbaṃ ahorat-tānusikkhinā kusalesu dhammesu.

14. puna ca paraṃ sārīputta, bhikkhunā iti paṭisañ-cikkhitabbaṃ: 'yena cāhaṃ maggena gāmaṃ piṇḍāya pāvisiṃ, yasmiñca padese piṇḍāya acarīṃ, yena ca maggena gāmato piṇḍāya paṭikkamiṃ. atthi nu kho me tattha jivhāviññeyyesu rasesu chando vā rāgo vā doso vā moho vā paṭighaṃ vāpi cetaso'ti.

15. sace sārīputta, bhikkhu paccavekkhamāno evaṃ jānāti: 'yena cāhaṃ maggena gāmaṃ piṇḍāya pāvisiṃ. yasmiñca padese piṇḍāya acarīṃ, yena ca maggena gāmato piṇḍāya paṭikkamiṃ. atthi me tattha jivhāviññeyyesu rasesu chando vā rāgo vā doso vā moho vā paṭighaṃ vāpi cetaso'ti. tena sārīputta, bhikkhunā tesamyeva pāpakānaṃ akusalānaṃ dhammānaṃ pahānāya vāyāmitabbaṃ.

16. sace pana sārīputta, bhikkhu paccavekkhamāno evaṃ jānāti: yena cāhaṃ maggena gāmaṃ piṇḍāya pāvisiṃ, yasmiñca padese piṇḍāya acarīṃ, yena ca maggena gāmato piṇḍāya paṭikkamīṃ. natthi me tattha jivhāviññeyyesu rasesu chando vā rāgo vā doso vā moho vā paṭighaṃ vāpi cetaso'ti. tena sārīputta, bhikkhunā teneva pitipāmojjena vihātabbaṃ ahoratānusikkhinā kusalesu dhammesu.

17. puna ca paraṃ sārīputta, bhikkhunā iti paṭisañcikkhitabbaṃ: 'yena cāhaṃ maggena gāmaṃ piṇḍāya pāvisiṃ, yasmiñca padese piṇḍāya acarīṃ, yena ca maggena gāmato piṇḍāya paṭikkamīṃ. atthi nu kho me tattha kāyaviññeyyesu phoṭṭhabbesu chando vā rāgo vā doso vā moho vā paṭighaṃ vāpi cetaso'ti.

18. sace sārīputta, bhikkhu paccavekkhamāno evaṃ jānāti: 'yena cāhaṃ maggena gāmaṃ piṇḍāya pāvisiṃ. yasmiñca padese piṇḍāya acarīṃ, yena ca maggena gāmato piṇḍāya paṭikkamīṃ. atthi me tattha kāyaviññeyyesu phoṭṭhabbesu chando vā rāgo vā doso vā moho vā paṭighaṃ vāpi cetaso'ti. tena sārīputta, bhikkhunā tesamyeva pāpakānaṃ akusalānaṃ dhammānaṃ pahānāya vāyamitabbaṃ.

19. sace pana sārīputta, bhikkhu paccavekkhamāno evaṃ jānāti: yena cāhaṃ maggena gāmaṃ piṇḍāya pāvisiṃ, yasmiñca padese piṇḍāya acarīṃ, yena ca

maggena gāmato piṇḍāya paṭikkamim. natthi me tattha kāyaviññeyyesu phoṭṭhabbesu chando vā rāgo vā doso vā moho vā paṭighaṃ vāpi cetaso'ti. tena sārīputta, bhikkhunā teneva pitipāmojjena vihātabbaṃ ahorattānusikkhinā kusalesu dhammesu.

20. puna ca paraṃ sārīputta, bhikkhunā iti paṭisañcikkhitabbaṃ: 'yena cāhaṃ maggena gāmaṃ piṇḍāya pāvisim, yasmiñca padese piṇḍāya acarim, yena ca maggena gāmato piṇḍāya paṭikkamim. atthi nu kho me tattha manoviññeyyesu dhammesu chando vā rāgo vā doso vā moho vā paṭighaṃ vāpi cetaso'ti.

21. sace sārīputta, bhikkhu paccavekkhamāno evaṃ jānāti: 'yena cāhaṃ maggena gāmaṃ piṇḍāya pāvisim, yasmiñca padese piṇḍāya acarim, yena ca maggena gāmato piṇḍāya paṭikkamim. atthi me tattha manoviññeyyesu dhammesu chando vā rāgo vā doso vā moho vā paṭighaṃ vāpi cetaso'ti. tena sārīputta, bhikkhunā tesamyeva pāpakānaṃ akusalānaṃ dhammānaṃ pahānāya vāyāmitabbaṃ.

22. sace pana sārīputta, bhikkhu paccavekkhamāno evaṃ jānāti: yena cāhaṃ maggena gāmaṃ piṇḍāya pāvisim, yasmiñca padese piṇḍāya acarim, yena maggena gāmato piṇḍāya paṭikkamim. natthi me tattha manoviññeyyesu dhammesu chando vā rāgo vā doso vā moho vā paṭighaṃ vāpi cetaso'ti. yena sārīputta, bhikkhunā teneva pītipāmojjena vihātabbaṃ ahorattānusikkhinā kulesu dhammesu.

23. puna ca param sārīputta, bhikkhunā iti paṭisañ-cikkhitabbam: pahīnā nu kho me pañca kāmagaṇā'ti,

24. sace sārīputta, bhikkhu paccavekkhamāno evaṃ jānāti: appahīnā kho me pañca kāmagaṇā'ti. tena sārīputta, bhikkhunā pañcannaṃ kāmagaṇānaṃ pahānāya vāyamitabbam.

25. sace pana sārīputta, bhikkhu paccavekkhamāno evaṃ jānāti: pahīnā kho me pañca kāmagaṇā'ti. tena sārīputta, bhikkhunā teneva pītipāmojjena vihātabbam ahorattānusikkhinā kusalesu dhammesu.

26. puna ca param sārīputta, bhikkhunā iti paṭisañ-cikkhitabbam: 'pahīnā nu kho me pañca nīvaraṇā'ti.

27. sace sārīputta, bhikkhu paccavekkhamāno evaṃ jānāti: appahīnā kho me pañca nīvaraṇā'ti. tena sārīputta, bhikkhunā pañcannaṃ nīvaraṇānaṃ pahānāya vāyamitabbam.

28. sace pana sārīputta, bhikkhu paccavekkhamāno evaṃ jānāti: pahīnā kho me pañca nīvaraṇā'ti. tena sārīputta, bhikkhunā teneva pītipāmojjena vihātabbam ahorattānusikkhinā kusalesu dhammesu.

29. puna ca param sārīputta, bhikkhunā iti paṭisañ-cikkhitabbam: pariññātā nu kho me pañcupādānak-khandhā'ti,

30. sace sārīputta, bhikkhu paccavekkhamāno evaṃ jānāti: अपariññātā kho me pañcupādānakkhandhā'ti. tena sārīputta, bhikkhunā pañcannaṃ upādānakkhandhānaṃ pariññāya vāyamitabbaṃ.

31. sace pana sārīputta, bhikkhu paccavekkhamāno evaṃ jānāti: pariññātā kho me pañcupādānakkhandhā'ti. tena sārīputta, bhikkhunā teneva pītipāmojjena vihātabbaṃ ahorattānusikkhinā kusalesu dhammesu.

32. puna ca paraṃ sārīputta, bhikkhunā iti paṭisañcikkhitabbaṃ: bhāvitā nu kho me cattāro satipaṭṭhānā'ti.

33. sace sārīputta, bhikkhu paccavekkhamāno evaṃ jānāti: abhāvitā kho me cattāro satipaṭṭhānā'ti. tena sārīputta, bhikkhunā catunnaṃ satipaṭṭhānānaṃ bhāvanāya vāyamitabbaṃ.

34. sace pana sārīputta, bhikkhunā paccavekkhamāno evaṃ jānāti: bhāvitā kho me cattāro satipaṭṭhānā'ti. tena sārīputta, bhikkhunā teneva pītipāmojjena vihātabbaṃ ahorattānusikkhinā kusalesu dhammesu.

35. puna ca paraṃ sārīputta, bhikkhunā iti paṭisañcikkhitabbaṃ: bhāvitā nu kho me cattāro sammappa-dhānā'ti.

36. sace sārīputta, bhikkhu paccavekkhamāno evaṃ jānāti: abhāvitā kho me cattāro sammappadhānā'ti. tena sārīputta, bhikkhunā catunnaṃ sammappadhānānaṃ bhāvanāya vāyāmitabbaṃ.

37. sace pana sārīputta, bhikkhu paccavekkhamāno evaṃ jānāti: bhāvitā kho me cattāro sammappadhānā'ti. tena sārīputta, bhikkhunā teneva pītipāmojjena vihātabbaṃ ahorattānusikkhinā kusalesu dhammesu.

38. puna ca paraṃ sārīputta, bhikkhunā iti paṭisañcikkhitabbaṃ: bhāvitā nu kho me cattāro iddhipādā'ti.

39. sace sārīputta, bhikkhu paccavekkhamāno evaṃ jānāti: abhāvitā kho me cattāro iddhipādā'ti. tena sārīputta, bhikkhunā catunnaṃ iddhipādānaṃ bhāvanāya vāyāmitabbaṃ.

40. sace pana sārīputta, bhikkhu paccavekkhamāno evaṃ jānāti: bhāvitā kho me cattāro iddhipādā'ti. tena sārīputta, bhikkhunā teneva pītipāmojjena vihātabbaṃ ahorattānusikkhinā kusalesu dhammesu.

41. puna ca paraṃ sārīputta, bhikkhunā iti paṭisañcikkhitabbaṃ: bhāvitā nu kho me pañcīndriyānī'ti.

42. sace sārīputta, bhikkhu paccavekkhamāno evaṃ jānāti: abhāvitā kho me pañcīndriyānī'ti. tena sārī-

putta, bhikkhunā pañcannaṃ indriyānaṃ bhāvanāya vāyamitabbaṃ.

43. sace pana sārīputta, bhikkhu paccavekkhamāno evaṃ jānāti: bhāvitā kho me pañcindriyānī'ti. tena sārīputta, bhikkhunā teneva pītipāmojjena vihātabbaṃ ahorattānusikkhinā kusalesu dhammesu.

44. puna ca paraṃ sārīputta, bhikkhunā iti paṭisañcikkhitabbaṃ: bhāvitā nu kho me pañcabalānī'ti.

45. sace sārīputta, bhikkhu paccavekkhamāno evaṃ jānāti: abhāvitā kho me pañcabalānī'ti. tena sārīputta, bhikkhunā pañcannaṃ balānaṃ bhāvanāya vāyamitabbaṃ.

46. sace pana sārīputta, bhikkhu paccavekkhamāno evaṃ jānāti: bhāvitā kho me pañcabalānī'ti. tena sārīputta, bhikkhunā teneva pītipāmojjena vihātabbaṃ ahorattānusikkhinā kusalesu dhammesu.

47. puna ca paraṃ sārīputta, bhikkhunā iti paṭisañcikkhitabbaṃ: bhāvitā nu kho me sattabojjhaṅgā'ti.

48. sace sārīputta, bhikkhu paccavekkhamāno evaṃ jānāti: abhāvitā kho me sattabojjhaṅgā'ti. tena sārīputta, bhikkhunā sattannaṃ bojjhaṅgānaṃ bhāvanāya vāyamitabbaṃ.

49. sace pana sārīputta, bhikkhu paccavekkhamāno evaṃ jānāti: bhāvitā kho me sattabojjhaṅgā'ti. tena sārīputta, bhikkhunā teneva pītipāmojjena vihātabbaṃ, ahorattānusikkhinā kusalesu dhammesu.

50. puna ca paraṃ sārīputta, bhikkhunā iti paṭisañ-cikkhitabbaṃ: 'bhāvito nu kho me ariyo aṭṭhaṅgiko maggo'ti.

51. sace sārīputta, bhikkhu paccavekkhamāno evaṃ jānāti: 'abhāvito kho me ariyo aṭṭhaṅgiko maggo'ti. tena sārīputta, bhikkhunā ariyassa aṭṭhaṅgikassa mag-gassa bhāvanāya vāyāmitabbaṃ.

52. sace pana sārīputta, bhikkhu paccavekkhamāno evaṃ jānāti: 'bhāvito kho me ariyo aṭṭhaṅgiko maggo'ti. tena sārīputta, bhikkhunā teneva pītipāmojjena vihā-tabbaṃ ahorattānusikkhinā kusalesu dhammesu.

53. puna ca paraṃ sārīputta, bhikkhunā iti paṭisañ-cikkhitabbaṃ: 'bhāvitā nu kho me samatho ca vipas-sanā cā'ti.

54. sace sārīputta, bhikkhu paccavekkhamāno evaṃ jānāti: 'abhāvitā kho me samatho ca vipassanā cā'ti. tena sārīputta, bhikkhunā samathavipassanānaṃ bhā-vanāya vāyāmitabbaṃ.

55. sace pana sārīputta, bhikkhu paccavekkhamāno evaṃ jānāti: 'bhāvitā kho me samatho ca vipassanā cā'ti. tena sārīputta, bhikkhunā teneva pītipāmojjena vihātabbaṃ ahorattānusikkhinā kusalesu dhammesu.

56. puna ca param sārīputta, bhikkhunā iti paṭisañcikkhitabbaṃ: 'sacchikatā nu kho me vijjā ca vimutti¹ cā'ti.

57. sace sārīputta, bhikkhu paccavekkhamāno evaṃ jānāti: 'asacchikatā kho me vijjā ca vimutti cā'ti. tena sārīputta, bhikkhunā vijjāya ca vimuttiyā ca sacchikariyāya vāyāmitabbaṃ.

58. sace pana sārīputta, bhikkhu paccavekkhamāno evaṃ jānāti: 'sacchikatā kho me vijjā ca vimutti cā'ti. tena sārīputta, bhikkhunā teneva pītipāmojjena vihātabbaṃ ahorattānusikkhinā kusalesu dhammesu.

59. ye hi keci sārīputta, atītamaddhānaṃ samaṇā vā brāhmaṇā vā piṇḍapātaṃ parisodhesuṃ. sabbe te evameva paccavekkhitvā paccavekkhitvā piṇḍapātaṃ parisodhesuṃ.

60. yepi hi keci sārīputta, anāgatamaddhānaṃ samaṇā vā brāhmaṇā vā piṇḍapātaṃ parisodhessanti, sabbe te evameva paccavekkhitvā paccavekkhitvā piṇḍapātaṃ parisodhessanti.

¹ vipassanā-sīmu.

61. yepi hi keci sārīputta, etarahi samaṇā vā brāhmaṇā vā piṇḍapātaṃ parisodhenti, sabbe te evameva paccavekkhitvā paccavekkhitvā piṇḍapātaṃ parisodhenti.

62. tena hi vo² sārīputta, evaṃ sikkhitabbam: 'paccavekkhitvā paccavekkhitvā piṇḍapātaṃ parisodhes-sāmā'ti. evaṃ hi vo sārīputta. sikkhitabbanti.

63. idamavoca: bhagavā. attamano āyasmā sārīputto bhagavato bhāsitam abhinandīti.

piṇḍapātapārisuddhi suttaṃ navamaṃ.

²tasmātiha sārīputta-sīmu,majasaṃ.